

06

ԴԵԿՏԵՄԲԵՐԻ
2022

Luys



Lnyu®

2022
MIDTERM
ELECTIONS

ԱՄՆ ՄԻՋԱՆԿՅԱԼ ԸՆՏՐՈՒԹՅՈՒՆՆԵՐԻ
ԱՐԴՅՈՒՆՔՆԵՐԸ

ԱՄՆ ՄԻՋԱՆԿՅԱԼ ԸՆՏՐՈՒԹՅՈՒՆՆԵՐԻ ԱՐԴՅՈՒՆՔՆԵՐԸ



2022թ. նոյեմբերի 8-ին Միացյալ Նահանգներում տեղի ունեցան ԱՄՆ Կոնգրեսի միջանկյալ ընտրությունները: Թեև որոշ նահանգներում դեռ ձայները վերջնական հաշվարկված չեն, իսկ որոշ դեպքերում ընթանալու են երկրորդ փուլով ընտրություններ, ընդհանուր պատկերն արդեն իսկ առկա է, որը շոշափելի փոփոխությունների չի ենթարկվի: 118-րդ գումարման ԱՄՆ Կոնգրեսի Ներկայացուցիչների պալատում մեծամասնություն են կազմելու հանրապետականները, իսկ Սենատում՝ դեմոկրատները: Այսպիսով, դեմոկրատները, ովքեր նախկինում վերահսկում էին երկու պալատները, կարողացան պահպանել միայն Սենատի վերահսկողությունը, ինչն իրականում կարելի է համարել լավ արդյունք:

Ընդհանրապես, Միացյալ Նահանգներում միջանկյալ ընտրությունների ժամանակ գործում է հետևյալ օրինաչափությունը. եթե նախագահը ընտրվում է Դեմոկրատական կուսակցությունից, ապա Կոնգրեսի միջանկյալ ընտրություններում մեծամասամբ հաղթում են հանրապետականները, և հակառակը: Նման կերպ ԱՄՆ քաղաքացիները, ըստ էության, հավասարակշռության մեխանիզմներ են ստեղծում երկու կուսակցությունների միջև՝ կանխելով ողջ իշխանության կենտրոնացումը մեկ կուսակցության ձեռքում: Այսպիսով, հաշվի առնելով, որ ԱՄՆ ներկայիս նախագահ Բայդենը Դեմոկրատական կուսակցության ներկայացուցիչ է, և ԱՄՆ Կոնգրեսի երկու պալատներում էլ մեծամասնություն էին կազմում Դեմոկրատական կուսակցության ներկայացուցիչները, այս տեսանկյունից նույնպես կանխատեսելի էր Հանրապետական կուսակցության հաղթանակը նոյեմբերի 8-ի ընտրություններում:

Այդուհանդերձ, այս կանխատեսումները ճիշտ էին միայն մասամբ, քանզի Սենատում դեմոկրատները պահպանեցին մեծամասնությունը: Այս մասով իր մեկնաբանությունն է տվել նաև ԱՄՆ նախագահ Բայդենը: Ընտրություններից հետո իր առաջին ասուլիսում, երբ առկա էին նախնական տվյալները, Բայդենը նշել է, որ չնայած մամուլի և մասնագետների գնահատականներին՝ հանրապետականները ամբողջական հաղթանակ չեն գրանցել: Նախագահի խոսքերով՝ ընտրություններում Դեմոկրատական կուսակցությունը «կորցրել է ավելի քիչ տեղեր, քան վերջին 40 տարվա ընթացքում դեմոկրատ այլ նախագահների օրոք առաջին միջանկյալ ընտրություններում: Իսկ նահանգապետների ընտրություններում մենք ունեցել ենք լավագույն միջանկյալ ընտրությունները 1986 թվականից ի վեր»։ Նշել է նախագահը:¹

ԱՄՆ ՍԵՆԱՏԻ ՄԻՋԱՆԿՅԱԼ ԸՆՏՐՈՒԹՅՈՒՆՆԵՐԸ

Մինչև նոյեմբերի 8-ի ընտրությունները ԱՄՆ 117-րդ գումարման Սենատը նույնպես վերահսկվում էր դեմոկրատների կողմից՝ 51:50 հարբերակությամբ (փոխնախագահ Քամալա Հարիսի ծայնը ներառյալ): Չնայած նրան, որ դեմոկրատ սենատորները 48-ն էին, իսկ հանրապետականները՝ 50, Դեմոկրատական կուսակցությունը ձևավորել էր մեծամասնություն՝ պայմանավորված հետևյալ պատճառներով: Նախ, կային 2 անկախ սենատորներ, ովքեր խմբակցում էին Դեմոկրատական կուսակցությանը՝ հավասարեցնելով դեմոկրատ և հանրապետական սենատորների թիվը: Այս պարագայում դեմոկրատ փոխնախագահ Քամալա Հարիսը ապահովում էր դեմոկրատների գերակայությունը, քանզի ըստ ԱՄՆ Սահմանադրության՝ նա հանդիսանում է Սենատի ղեկավար և կարող է քվեարկել այն դեպքում, երբ քվեարկության ժամանակ ծայները հավասար են բաշխվում:²

Նոյեմբերի 8-ին ԱՄՆ Սենատի 100 տեղերից ընտրությունների էին դրված 100 սենատորներից 35-ը, որոնցից 14-ը զբաղեցնում էին դեմոկրատ սենատորները, իսկ 21-ը՝ հանրապետականները:³ Այժմ արդեն կարելի է նշել, որ դեմոկրատներին հաջողվել է պահպանել մեծամասնությունը Սենատում: Նոյեմբերի 24-ի տվյալներով,

¹ Remarks by President Biden in Press Conference on November 9, 2022, <https://www.whitehouse.gov/briefing-room/speeches-remarks/2022/11/09/remarks-by-president-biden-in-press-conference-8/>, (21.11.2022).

² U.S. Constitution, Article I, section 3, https://www.senate.gov/civics/constitution_item/constitution.htm#a1_sec3, (21.07.2022).

³ United States Senate elections, 2022, https://ballotpedia.org/United_States_Senate_elections,_2022, (21.07.2022).

դեմոկրատ թեկնածուների թիվը հասել է 50-ի (2-ը՝ անկախ թեկնածուներ, ովքեր խմբակցում են դեմոկրատներին), իսկ հանրապետականներն ունեն 49 սենատոր:⁴

Ընտրություններից առաջ կային մի քանի նահանգներ, որոնք առավել խոցելի էին Դեմոկրատական և Հանրապետական կուսակցությունների համար, և որոնց դեպքում երկու կուսակցությունների ներկայացուցիչները թե՛ պայքարի մեջ էին: Այդ նահանգներն են՝ Վիսկոնսինը, Փենսիլվանիան, Արիզոնան, Նևադան և Ջորջիան: Վիսկոնսին և Փենսիլվանիա նահանգները հատկապես խոցելի էին հանրապետականների համար, իսկ վերջին երեք նահանգները՝ դեմոկրատների:

Վիսկոնսին նահանգը ներկայացնում էր հանրապետական սենատոր Ռոն Ջոնսոնը, ով սակայն առերեսվել էր դեմոկրատ թեկնածու Մարնելա Բարնսի հետ: Ըստ հարցումների՝ վերջինս մեծ հնարավորություն ուներ հաղթելու այս նահանգում: Հանրապետականները պնդում էին, որ Ջոնսոնը թերագնահատված է, և թեև նրան նախկինում էլ են թերագնահատել, բայց, միևնույն է, հաղթել է: Ի վերջո, հանրապետականները ճիշտ էին, և թեկուզ փոքր տարբերությամբ՝ 50.5%:49.5% Ջոնսոնը հաղթանակ տարավ:⁵

Հանրապետականների համար երկրորդ խոցելի նահանգը Փենսիլվանիան էր: Իսնդիրը կայանում էր նրանում, որ այդ նահանգը ներկայացնող հանրապետական սենատոր Փեթ Թոմփին դեռևս 2020թ. հայտարարել էր, որ հեռանում է քաղաքականությունից և մտադրություն չունի առաջադրվելու որևէ պաշտոնում: Այդ որոշումը ծանր իրադրության մեջ դրեց հանրապետականներին՝ պայքարի բաց դաշտ թողնելով դեմոկրատների և հանրապետականների համար:⁶ Նման պայմաններում այս նահանգում հանրապետականների կողմից իր թեկնածությամբ հանդես եկավ ազգությամբ թուրք Մեհմեդ Օզը: Վերջինս մասնագիտությամբ՝ վիրաբույժ, իսկ այժմ հայտնի հեռուստաաստղ է, ում հաջողվել էր ստանալ ԱՄՆ նախկին նախագահ Թրամփի աջակցությունը դեռևս գարնանը տեղի ունեցած

⁴ United States Senate elections, 2022 https://ballotpedia.org/United_States_Senate_elections,_2022, (21.11.2022.)

⁵ Mandela Barnes gets open path to take on Wisconsin Sen. Ron Johnson, <https://www.politico.com/news/2022/07/27/alex-lasry-dropping-out-of-wisconsin-senate-race-to-unseat-ron-johnson-00048186>, (22.07.2022).

⁶ Sen. Pat Toomey to retire from politics in blow to GOP, <https://www.politico.com/news/2020/10/05/pat-toomey-senate-retirement-426429>, (22.07.2022).

փրայմերիզի ընթացքում:⁷ Օզի մրցակիցն այս նահանգում դեմոկրատ թեկնածու Ջոն Ֆեթթերմանն էր: Երկուսի միջև հիրավի լուրջ պայքար էր ծավալվել, որի շրջանակներում նախընտրական գովազդների համար միլիոնավոր դոլարներ էին ծախսվում, մասնավորապես՝ Օզի կողմից: Չնայած գործադրված մեծ ջանքերին՝ Օզը պարտվեց դեմոկրատ թեկնածուին՝ ձայների 51.2%:46.4% հարաբերակցությամբ:⁸ Հաշվի առնելով, որ Օզը նաև Թուրքիայի քաղաքացի է և ունի խոր կապեր թուրքական բիզնես էլիտայի և քաղաքական շրջանակների հետ, որոնք էլ իրենց հերթին կապված են Էրդողանի հետ,⁹ Օզի պարտությունը հատկապես կարևոր էր հայկական համայնքի և լոբբիստների համար, ովքեր համակարգված աշխատանք էին իրականացրել՝ կանխելու Օզի՝ Սենատում հայտնվելը:

Ինչ վերաբերում է դեմոկրատական կուսակցության համար խոցելի նահանգներին, ապա դրանց շրջանակներում հարկ է հատկապես առանձնանել Արիզոնան, Նևադան և Ջորջիան: Այս նահանգները ներկայացնում էին դեմոկրատ սենատորներ, այնուամենայնիվ այս միջանկյալ ընտրություններում իրենց հետագա պաշտոնավարումը վտանգված էր՝ պայմանավորված հանրապետականների կողմից հանրաճանաչ թեկնածուների ներկայացմամբ, դեմոկրատների օրոք տնտեսական իրավիճակի վատթարացմամբ և ժողովրդագրական իրավիճակի փոփոխություններով:¹⁰

Այդուհանդերձ, նոյեմբերի 24-ի տվյալներով դեմոկրատ թեկնածուները հաղթել են Արիզոնա և Նևադա նահանգներում: Արիզոնա նահանգում հաղթանակից հետո դեմոկրատների և հանրապետականների ձայները հավասարվեցին, ինչը նշանակում էր, որ Նևադայում կամ Ջորջիա նահանգում հաղթելու պարագայում դեմոկրատները

⁷ 2022 Midterms: A Guide to the Races Worth Watching A cheat sheet for all the crucial races, upsets, and campaign drama from now through Election Day, <https://nymag.com/intelligencer/article/2022-midterms-guide.html>, (22.07.2022).

⁸ In a race marked by trolling and drama, Fetterman defeats Oz for Pennsylvania Senate seat, <https://www.latimes.com/politics/story/2022-11-08/fetterman-oz-results-in-pennsylvania-senate-race-marked-by-trolling>, (22.07.2022).

⁹ Would Turkey's president have leverage over 'Senator Doctor Oz'?

<https://www.washingtonpost.com/opinions/2022/02/16/doctor-oz-close-ties-to-turkey-raise-concern-about-senate-candidacy/>, (23.07.2022).

¹⁰ Senate, Balance of the chamber could come down to four states where Democrats are up for reelection, https://www.washingtonpost.com/politics/interactive/2022/senate-control-midterms-2022/?itid=lk_readmore_elections_enhanced_index, (23.07.2022).

կապահպանեն իրենց մեծամասնությունը:¹¹ Նևադա նահանգում ընդամենը 0.9%-ով ավելի ձայների միջոցով հաղթեց դեմոկրատ թեկնածուն: Սա նշանակում է, որ անկախ դեկտեմբերի 6-ին Զորջիայում կայանալիք երկրորդ փուլի ընտրությունների արդյունքներից՝ դեմոկրատները կապահպանեն մեծամասնությունը Սենատում:¹²

Այսպիսով, հակառակ այն կանխատեսումներին, որ Սենատում ևս հանրապետականները կկարողանան առավել շատ տեղեր ձեռք բերել¹³՝ վերահսկելով Կոնգրեսի երկու պալատներն էլ, դեմոկրատ թեկնածուները, թեև փոքր տարբերություններով, բայց կարողացան պահպանել իրենց դիրքերը առավել խոցելի նահանգներում՝ ապահովելով Դեմոկրատական կուսակցության մեծամասնությունը Սենատում մինչև 2024-ին կայանալիք՝ հաջորդ ընտրությունները :

ԱՄՆ ՆԵՐԿԱՅԱԳՈՒՅՈՒՆՆԵՐԻ ՊԱԼԱՏԻ ՄԻՋԱՆԿՅԱԼ ԸՆՏՐՈՒԹՅՈՒՆՆԵՐԸ ԵՎ ՀԱՅԿԱԿԱՆ ՀԱՐՑԵՐՈՎ ՀԱՆՁՆԱԽՄԲԻ ԱՆԴԱՄՆԵՐԻ ԳՐԱՆՑԱԾ ԱՐԴՅՈՒՆՔՆԵՐՆ ԸՆՏՐՈՒԹՅՈՒՆՆԵՐՈՒՄ

Մինչև 2020թ. նոյեմբերի 8-ի միջանկյալ ընտրությունները ԱՄՆ Ներկայացուցիչների պալատում մեծամասնություն էին կազմում Դեմոկրատական կուսակցության ներկայացուցիչները՝ 435 տեղից զբաղեցնելով 222-ը, իսկ հանրապետականները՝ 213: Ներկայացուցիչների պալատում դեմոկրատները մեծամասնություն ձեռք բերեցին Դոնալդ Թրամփի պաշտոնավարման ժամանակ՝ ապահովելով հանրապետական վարչակազմի և դեմոկրատ օրենսդիրի հավասարակշռությունը: Հաշվի առնելով, որ հանրապետական և դեմոկրատ կուսակցությունների որոշ ներկայացուցիչներ պաշտոնաթող էին եղել, 2022թ. նոյեմբերի 1-ի դրությամբ դեմոկրատները շարունակում էին պահել 220:212 առավելություն ԱՄՆ Ներկայացուցիչների պալատում: Ստացվում է, որ այս նոյեմբերին կայանալիք ընտրություններում հանրապետականներին պետք էր հավաքել ևս 5 մանդատ՝ պալատում մեծամասնություն կազմելու համար:

¹¹ Mark Kelly wins Senate race in Arizona, <https://www.pbs.org/newshour/politics/mark-kelly-wins-senate-race-in-arizona>, (23.07.2022).

¹² Catherine Cortez Masto, <https://www.theguardian.com/us-news/2022/nov/13/catherine-cortez-masto-wins-nevada-senate-race>, (23.07.2022).

¹³ Republicans are slightly favored to win the Senate, <https://projects.fivethirtyeight.com/2022-election-forecast/senate/>, (23.11.2022).

Ի տարբերություն Սենատի՝ Ներկայացուցիչների պալատում ընտրության են դրված բոլոր 435 ներկայացուցիչների տեղերը:¹⁴ Նոյեմբերի 24-ի դրությամբ Հանրապետական կուսակցությունը մեծամասնություն է կազմում Ներկայացուցիչների պալատում՝ ստանալով 220 մանդատ, իսկ դեմոկրատները՝ 213:¹⁵

ԱՄՆ Ներկայացուցիչների պալատի 49 անդամներ նախօրոք հայտարարել էին, որ չեն պատրաստվում վերընտրվել 2022 թվականին: 49 կոնգրեսականներից 32-ը հայտարարեցին իրենց պաշտոնաթողության մասին: Նրանցից 22-ը դեմոկրատ էին, իսկ 10-ը՝ հանրապետական:

ԱՄՆ Ներկայացուցիչների պալատի տասնյոթ անդամներ առաջադրվել են այլ պաշտոնների համար.

- Հինգ հանրապետական և չորս դեմոկրատ հավակնում էին մանդատ ստանալ ԱՄՆ Սենատում:
- Նահանգապետի պաշտոնի համար առաջադրվել էին մեկ հանրապետական և երեք դեմոկրատ:
- Մեկ հանրապետական առաջադրվել է Ջորջիա նահանգի պետքարտուղարի պաշտոնի համար:
- Մեկ դեմոկրատ առաջադրվել է քաղաքապետի պաշտոնում:
- Գլխավոր դատախազի պաշտոնի համար առաջադրվել են մեկ դեմոկրատ և մեկ հանրապետական:¹⁶

Հարկ է նշել, որ ԱՄՆ Ներկայացուցիչների պալատի Հայկական հարցերով հանձնախմբի անդամներից ոմանք այլևս չեն շարունակի պաշտոնավարել որպես կոնգրեսական: Նրանց կարելի է բաժանել երեք խմբի. նրանք, ովքեր նախապես հայտարարել են այլևս չառաջադրվելու մասին, հանձնախմբի անդամներ, ովքեր պարտվել են ընտրություններում և նրանք, ովքեր առաջադրվել են այլ պաշտոններում: Հանձնախմբի 13 անդամներ հայտարարել էին, որ գալիք միջանկյալ ընտրություններում այլևս չեն առաջադրվելու որպես կոնգրեսական: Նրանց թվում է

¹⁴ United States House of Representatives elections, 2022, https://ballotpedia.org/United_States_House_of_Representatives_elections,_2022, (24.07.2022).

¹⁵ Republican House majority climbs to 220 with win in California, <https://thehill.com/homenews/campaign/3748047-republican-house-majority-climbs-to-220-with-win-in-california/>, (24.11.2022).

¹⁶ List of U.S. Congress incumbents who did not run for re-election in 2022, https://ballotpedia.org/List_of_U.S._Congress_incumbents_who_did_not_run_for_re-election_in_2022, (24.11.2022).

նաև հայկական արմատներ ունեցող և ԱՄՆ Կոնգրեսի Հայկական հարցերով հանձնախմբի համանախագահ Ջեքի Սփիերը, ով 2021թ. հայտարարել էր, որ այլևս չի առաջադրվի կոնգրեսականի պաշտոնում:¹⁷ Այս մասին հայտարարելիս Սփիերն ասել էր. «Ժամանակն է, որ ես տուն վերադառնամ: Ժամանակն է, որ ես լինեմ կին, մայր և ընկեր ոչ միայն շաբաթվա վերջին... բացառիկ առաքելություն էր, պատիվ էր ներկայացնել Սան Մատեո շրջանի և Սան Ֆրանցիսկոյի ժողովրդին կառավարման գրեթե բոլոր մակարդակներում՝ մոտ չորս տասնամյակ»:¹⁸ Սփիերի հեռացումը մեծ կորուստ կլինի հայկական հանձնախմբի համար, քանի որ վերջինս մշտապես ակտիվորեն պայքարել է ԱՄՆ կոնգրեսում հայերի շահերի առաջնության համար՝ նախաձեռնելով և համահեղինակելով բազմաթիվ հայամետ բանաձևեր, միանալով հայամետ նախաձեռնություններին: Բացի այդ, 2019թ. Ջեքի Սփիերը եղել է այն կոնգրեսականների թվում, ովքեր այցելեցին Արցախ: Սփիերը աջակցել է նաև Արցախին օգնության տրամադրմանը, Ադրբեջանին տրամադրվող անվտանգային օգնության սահմանափակմանը և Ադրբեջանում պահվող հայ ռազմագերիների և քաղաքացիականների՝ Հայաստան վերադարձնելուն: Ջեքի Սփիերը նաև այս տարի Հայաստան ժամանած ԱՄՆ Ներկայացուցիչների պալատի խոսնակ Նենսի Փելոսիի պատվիրակության կազմում էր: Այնուամենայնիվ, Հայկական հանձնախմբի մյուս համանախագահներ Գուս Բիլիրակիսը և Ֆրանկ Փալոնը կշարունակեն պաշտոնավարել: Հետաքրքրական է, որ ոչ միայն Հայկական հարցերով հանձնախմբի նախագահն է հեռանում պաշտոնից, այլ նաև Թուրքիայի և Ադրբեջանի հարցերով հանձնախմբի նախագահ, հանրապետական Սթիվ Չաբոթը, ով Օհայո նահանգում պարտվել է դեմոկրատ թեկնածուին:

Հայերի համար կարևոր է նաև, որ Նյու Ջերսի նահանգից կոնգրեսական է ընտրվել հայերի լավ բարեկամ և հայկական հարցերը Սենատում մշտապես բարձրաձայնող սենատոր Բոբ Մենենդեզի որդին՝ Բոբ Մենենդեզ կրտսերը,¹⁹ ով ըստ էության 118-րդ գումարման Կոնգրեսում կհամալրի Հայկական հարցերով հանձնախմբի անդամների շարքերը:

¹⁷ Rep. Jackie Speier retiring from Congress, <https://www.politico.com/news/2021/11/16/jackie-speier-retiring-congress-522690>, (24.07.2022).

¹⁸ Rep. Jackie Speier retiring from Congress, <https://www.politico.com/news/2021/11/16/jackie-speier-retiring-congress-522690>, (25.11.2022).

¹⁹ Menendez sails to victory in 8th District, winning House seat his father once held, <https://www.politico.com/news/2022/11/09/2022-midterms-new-jersey-rob-menendez-00065805>, (25.11.2022).

Ուշադրության է արժանի նաև այն հանգամանքը, որ Ներկայացուցիչների պալատի խոսնակ, Կոնգրեսի Հայկական հարցերով հանձնախմբի անդամ և հայերի մեծ բարեկամ Նենսի Փելոսին դեռևս կշարունակի պաշտոնավարել՝ որպես կոնգրեսական՝ կորցնելով խոսնակի պաշտոնը հանրապետականների հաղթանակից հետո: Չնայած կոնգրեսականի պաշտոնը թողնելու իր նախկին հայտարարություններին և դեսպանի պաշտոնը ստանձնելու խոսակցություններին՝ Նենսի Փելոսին հայտարարել է, որ կշարունակի լինել Ներկայացուցիչների պալատում՝ մնալով Հայկական հանձնախմբի ներկայացուցիչ:²⁰

Հայկական հանձնախմբի մի շարք կոնգրեսականներ իրենց հերթին հրաժարվել են Կոնգրեսի ընտրապայքարից՝ փորձելով առաջադրվել այլ պաշտոններում: Նրանց թվում է կոնգրեսական Քերեն Բասը, ով հաղթել է Լոս Անջելեսի քաղաքապետի ընտրություններում՝ դառնալով Լոս Անջելեսի առաջին կին քաղաքապետը:²¹ Հայկական հանձնախմբի մեկ այլ կոնգրեսական՝ Էնթոնի Բրաունը իր հերթին կստանձնի Մերիլենդի գլխավոր դատախազի պաշտոնը:²² Իսկ Կոնգրեսական Թոմ Սուազին առաջադրվել էր Նյու Յորքի նահանգապետի պաշտոնի համար, սակայն ընտրապայքարում հաղթել չհաջողվեց:²³

Հարկ է նշել նաև, որ Ներկայացուցիչների պալատի Հայկական հանձնախմբի երեք կոնգրեսականների չի հաջողվել հաղթել ընտրապայքարում: 2023թ. հունվարին նրանք կլքեն իրենց պաշտոնները:

²⁰ Nancy Pelosi to step down as House Democratic leader after two decades, with GOP set to take narrow majority, <https://www.cnbc.com/2022/11/17/nancy-pelosi-to-step-down-as-house-democratic-leader-as-gop-to-take-majority.html>, (25.11.2022).

²¹ Karen Bass elected mayor, becoming first woman to lead L.A., <https://www.latimes.com/california/story/2022-11-16/2022-california-election-bass-wins-los-angeles-mayor-caruso>, (25.11.2022).

²² Anthony Brown wins historic victory in Maryland attorney general race, <https://www.washingtonpost.com/dc-md-va/2022/11/08/maryland-attorney-general-results-brown-peroutka/>, (26.11.2022).

²³ Tom Suozzi, https://ballotpedia.org/Tom_Suozzi, (26.11.2022).

ՄԻՋԱՆԿՅԱԼ ԸՆՏՐՈՒԹՅՈՒՆՆԵՐԻ ԱԶԴԵՑՈՒԹՅՈՒՆԸ ԱՄՆ ԱՐՏԱՔԻՆ ՔԱՂԱՔԱԿԱՆՈՒԹՅԱՆ ՎՐԱ

Թեև Սենատում դեմոկրատները կարողացան պահպանել մեծամասնությունը, այնուամենայնիվ Ներկայացուցիչների պալատում վերջիններս զիջեցին իրենց դիրքերը հանրապետականներին, ինչն իր հերթին կարող է որոշակի ազդեցություն ունենալ ԱՄՆ վարած արտաքին քաղաքականության վրա՝ բարդացնելով Բայդենի վարչակազմի որդեգրած քաղաքականության իմպլեմենտացիան, այդ թվում՝ իրավական նախաձեռնությունների և Ուկրաինային ֆինանսական միջոցների տրամադրման տեսանկյունից:

Հաշվի առնելով ներկայումս աշխարհում արագ զարգացող գործընթացներն ու լարված աշխարհաքաղաքական մրցապայքարը՝ առաջարկում ենք երեք տարբեր օրինակներով դիտարկել ԱՄՆ արտաքին քաղաքականության հնարավոր փոփոխությունը, կենտրոնանալով այնպիսի ուղղությունների վրա, ինչպիսիք են Ուկրաինական պատերազմը, Չինաստանի քաղաքական և տնտեսական վերելքն ու ԱՄՆ քաղաքականությունը Պեկինի աճող ազդեցությունը զսպելու տեսանկյունից, ինչպես նաև դիտարկենք ԱՄՆ քաղաքականությունը Հայաստանի նկատմամբ:

Ուկրաինական ճգնաժամը, բնականաբար, Վաշինգտոնի կարևորագույն արտաքին քաղաքական առաջնահերթություններից է, եթե ոչ ամենակարևորն այս պահին: Բայդենի վարչակազմն արդեն 18 միլիարդ ԱՄՆ դոլարի անվտանգային և ռազմական օգնություն է տրամադրել Ուկրաինային՝ փետրվարից ի վեր²⁴: Վաշինգտոնում, իհարկե, Ուկրաինային աջակցելու առումով քաղաքական կոնսենսուս կա և մեծ հաշվով ձևավորվել է լուրջ հակառուսական հանրային կարծիք, սակայն որքան երկար է տևում պատերազմը, այնքան ավելանում են դժգոհությունները ԱՄՆ-ում թե՛ շարքային քաղաքացիների շրջանում և թե՛ քաղաքական որոշ շրջանակներում: Ինչպես արդեն նշվեց, ԱՄՆ երկու կուսակցությունների ներկայացուցիչները միակարծիք են Ռուսաստանի դեմ Ուկրաինային աջակցելու առումով, այնուամենայնիվ, խնդիրը խոշոր ծավալների օգնությունն է, որը երկարաժամկետ կտրվածքով մեծ խոչընդոտ կարող է դառնալ ԱՄՆ տնտեսության համար՝ հաշվի առնելով երկրում տիրող գնաճի բարձր

²⁴ \$400 Million in Additional Security Assistance for Ukraine, <https://www.defense.gov/News/Releases/Release/Article/3210297/400-million-in-additional-security-assistance-for-ukraine/>, (28.11.2022).

մակարդակը և գործազրկության շարունակական աճը: Այս խնդիրը արդեն իսկ սկսել են բարձրաձայնել հանրապետականները: Վերին պալատում, այսինքն՝ Սենատի պարագայում, Ուկրաինային աջակցության առումով երկու կուսակցությունների միջև ընդհանուր առմամբ փոխհամաձայնություն կա: Սենատի մեծամասնության առաջնորդ Չակ Շումերը և Սենատի փոքրամասնության առաջնորդ Միք ՄքՔոնելը կողմ են Ուկրաինային շարունակական աջակցության Բայդենի քաղաքականությանը: Այնուամենայնիվ, Ներկայացուցիչների պալատում իրավիճակը փոխվեց հանրապետականների հաղթանակով:²⁵ Ներկայացուցիչների պալատի հանրապետականների ներկայիս ղեկավար և ապագայում ամենայն հավանականությամբ խոսնակ Քևին ՄքՔարթին նշել էր, որ Պալատում մեծամասնություն ստանալու պարագայում հանրապետականներն այլևս չեն պատրաստվում անսահմանափակ օգնություն տրամադրել Ուկրաինային, քանի որ ԱՄՆ քաղաքացիները չեն աջակցի Ուկրաինային հետագա օգնության տրամադրմանը, քանի դեռ առկա են ներքին լուրջ տնտեսական խնդիրներ:²⁶

Վերջերս արված հարցումները ևս հաստատում են ՄքՔարթի խոսքերը: Մասնավորապես, «Wall Street Journal»-ի կողմից անցկացված հարցումների ժամանակ հանրապետական քվեարկողների 48%-ը նշել է, որ ԱՄՆ-ը անում է ավելին, քան պետք է, ինչը 6%-ով ավելի է՝ համեմատած նախկին հարցումների հետ:²⁷ Ըստ այդմ, թեև ԱՄՆ երկու կուսակցություններն ընդհանուր առմամբ համակարծիք են Ուկրաինային սատարման հարցում, հանրապետականների կողմից Ներկայացուցիչների պալատում մեծամասնություն կազմելուց հետո հնարավոր են Ուկրաինային տրամադրվող օգնության ծավալների կրճատումներ կամ սահմանափակումներ:

Ինչ վերաբերում է Չինաստանի նկատմամբ քաղաքականությանը, ապա պետք է նշել, որ սկսած հատկապես Դոնալդ Թրամփի ղեկավարման տարիներից, ԱՄՆ-Չինաստան հարաբերությունները բավականին վատթարացել են: Իր հերթին Ջո Բայդենը ստանձնել է ԱՄՆ նախագահի պաշտոնը մի շրջանում, երբ ԱՄՆ-Չինաստան

²⁵ Opinion – The Midterm Elections and US Support for Ukraine, <https://www.e-ir.info/2022/11/15/opinion-the-midterm-elections-and-us-support-for-ukraine/>, (28.11.2022).

²⁶ McCarthy: No ‘blank check’ for Ukraine if GOP wins majority, <https://apnews.com/article/russia-ukraine-donald-trump-humanitarian-assistance-congress-c47a255738cd13576aa4d238ec076f4a>, (28.11.2022).

²⁷ Republican Opposition to Helping Ukraine Grows, WSJ Poll Finds, <https://www.wsj.com/articles/republican-opposition-to-helping-ukraine-grows-wsj-poll-finds-11667467802>, (28.11.2022).

հարաբերություններում գերիշխում են առևտրային պատերազմը, փոխադարձ պատժամիջոցները, ինչպես նաև Հոնկոնգի և Թայվանի շուրջ լարվածությունը: Սա իր հերթին ազդեցություն է ունենում ԱՄՆ-ում Չինաստանի մասին հանրային կարծիքի վրա: Ըստ այդմ, «Pew Research Center»-ի կողմից իրականացված հարցումների համաձայն՝ ԱՄՆ 10 քաղաքացիներից 9-ը (չափահաս քաղաքացիների 89%-ը) Չինաստանը համարում են «մրցակից կամ թշնամի»:²⁸

Հաշվի առնելով ձևավորված կոշտ քաղաքականությունը Չինաստանի նկատմամբ, որը նաև աջակցություն է ստանում հասարակության կողմից, ԱՄՆ 118-րդ գումարման Կոնգրեսի Ներկայացուցիչների պալատում հանրապետական մեծամասնությունը լուրջ փոփոխություններ չի մտցնի: Կան շատ փոքր հնարավորություններ այդ կոշտ քաղաքականությունից շեղվելու առումով: Մասնավորապես, Չինաստանի նկատմամբ Թրամփի կողմից սահմանված տարիֆների որոշակի նվազեցման Բայդենի առաջարկը կարող է ընդունվել, քանզի շատ հանրապետականներ աջակցում են այս նախաձեռնությանը: Սակայն, ընդհանուր առմամբ, հնարավոր են անհամաձայնություններ հանրապետական մեծամասնության և դեմոկրատ վարչակազմի միջև՝ կապված առաջարկված նախաձեռնությունների կոնկրետ դրույթների հետ:²⁹

Ինչ վերաբերում է Հայաստանի հանդեպ քաղաքականության հնարավորության փոփոխությանը, ապա հարկ է նշել, որ այս առումով ևս էական փոփոխություններ չեն լինի: Իհարկե, ԱՄՆ Ներկայացուցիչների պալատում Հայկական հարցերով հանձնախմբի անդամների գերակշիռ մասը շարունակելու են պաշտոնավարել գալիք Կոնգրեսում: Չնայած Հանձնախմբի որոշ կոնգրեսականներ այլևս չեն պաշտոնավարի միջանկյալ ընտրություններից հետո, այնուամենայնիվ, ԱՄՆ-ում հայ լոբբիստները կփորձեն հանձնախմբի մեջ ներգրավվել նոր անդամների: Ավանդաբար հայկական համայնքն ու հայ լոբբիստները լավ կապեր ունեն և առավել արդյունավետ աշխատում են Դեմոկրատական կուսակցության ներկայացուցիչների հետ: Դա պայմանավորված է այն հանգամանքով, որ էթնիկ հայերը հիմնավորապես բնակվում են այն նահանգներում, որոնք ավանդաբար համարվում են դեմոկրատական կողմնորոշում ունեցող նահանգներ: Դրանց թվին են պատկանում

²⁸ Most Americans Support Tough Stance Toward China on Human Rights, Economic Issues, <https://www.pewresearch.org/global/2021/03/04/most-americans-support-tough-stance-toward-china-on-human-rights-economic-issues/>, (29.11.2022).

²⁹ What the Midterm Elections Mean for U.S. Foreign Policy, <https://www.cfr.org/blog/what-midterm-elections-mean-us-foreign-policy>, (29.11.2022).

Կալիֆոռնիան, Մասաչուսեթսը, Նյու Յորքը, Նյու Ջերսին և այլն: Այսպիսով, Ներկայացուցիչների պալատում հանրապետականների կողմից մեծամասնություն կազմելը պետք է դիտարկել որպես հնարավորություն, այլ ոչ թե խոչընդոտ՝ առավել սերտ կապեր հաստատելու այս կուսակցության ներկայացուցիչների հետ: Իսկ ինչ վերաբերում է Հայաստանի նկատմամբ քաղաքականության փոփոխությանը, այստեղ լուրջ սպասելիքներ չարժե ունենալ, քանի որ ամերիկյան քաղաքականությունը Հայաստանի նկատմամբ ձևավորվել է՝ հաշվի առնելով Հարավային Կովկասում ամերիկյան գլոբալ հետաքրքրությունները, ԱՄՆ քաղաքականությունը Իրանի և Ռուսաստանի նկատմամբ, ինչպես նաև երեք պետությունների փոխհարաբերությունները միմյանց հետ: Ոչ պակաս գործոն է նաև թուրքական գործոնը, որը դիտարկվում է Հարավային Կովկասում ամերիկյան ազդեցության ձեռքբերման միակ պլանգրամ:

ԵԶՐԱԿԱՑՈՒԹՅՈՒՆ

Այսպիսով, ԱՄՆ 118-րդ գումարման Կոնգրեսի Ներկայացուցիչների պալատում հունվարի 3-ից մեծամասնություն է կազմելու Հանրապետական կուսակցությունը, իսկ Սենատում՝ Դեմոկրատական կուսակցությունը: Նոյեմբերի 24-ի դրությամբ Ներկայացուցիչների պալատում Հանրապետական կուսակցությունն ունի 220 մանդատ, իսկ դեմոկրատները՝ 213: Սենատում հարաբերակցությունը 49:50 է: Ուստի, այս անգամ նույնպես պահպանվեց այն հավասարակշռման օրինաչափությունը, որը շատ հաճախ գործում է Միացյալ Նահանգների ընտրություններում: Այսինքն՝ դեմոկրատ Բայդենի վարչակազմի օրոք Ներկայացուցիչների պալատը վերահսկելու են հանրապետականները՝ հավասարակշռելով օրենսդիր ու գործադիր իշխանություններին:

Հայկական հարցերով հանձնախմբի որոշ անդամներ այլևս ներկայացված չեն լինի Կոնգրեսում, որոնց թվում է Հանձնախմբի համանախագահ և արմատներով հայ Ջեքի Սփիրը: Իսկ ԱՄՆ Ներկայացուցիչների պալատի խոսնակ Նենսի Փելոսին, ով 2022թ. սեպտեմբերի 17-19-ը այցելել էր Հայաստան, կշարունակի պաշտոնավարել որպես կոնգրեսական՝ կորցնելով խոսնակի պաշտոնը: Ներկայացուցիչների պալատում Հանրապետական կուսակցության մեծամասնություն կազմելը կարող է հայերի համար հնարավորություն դառնալ՝ փորձելու սերտ հարաբերություններ հաստատել և առավել խոր համագործակցություն ծավալել նաև հանրապետականների հետ, ինչպես ավանդաբար հաջողվել է անել դեմոկրատներին հետ:

Ուշագրավ է նաև այն, որ Թուրքիայի և Ադրբեջանի հարցերով հանձնախմբի նախագահ Սթիվ Չաբոթը այլևս չի պաշտոնավարի ԱՄՆ Ներկայացուցիչների պալատում՝ պարտվելով այս ընտրություններում: Հայ համայնքի և հայ լոբբիստների մեծ ջանքերով այս ընտրություններում պարտվեց նաև ազգությամբ թուրք և Թուրքիայի էլիտայի հետ սերտ կապեր ունեցող Մեհմեդ Օզը, ով առաջադրվել էր սենատորի պաշտոնում: ԱՄՆ արտաքին քաղաքականության առումով միջանկյալ ընտրություններն էական փոփոխություններ չեն ձևավորի: ԱՄՆ-ը կշարունակի աջակցել Ուկրաինային Ռուսաստանի դեմ մղվող պատերազմում, այնուամենայնիվ, հնարավոր է օգնության ծավալների որոշակի սահմանափակում տեղի ունենա: Ինչ վերաբերում է Չինաստանին, ապա այդ առումով էլ ԱՄՆ-ը կշարունակի կոշտ քաղաքականություն վարել՝ դիտարկելով Չինաստանին որպես թիվ մեկ մարտահրավեր, մրցակից և «գլխացավանք»:

Ամերիկյան հեղազոտությունների հայկական կենտրոն

«ԼՈՒՅՍ հիմնադրամ» գրառմամբ հրապարակված նյութը պաշտպանված է ՀՀ օրենսդրությամբ և միջազգային համաձայնագրերով: Հրապարակված նյութի բոլոր իրավունքների բացառիկ իրավատերը **«ԼՈՒՅՍ»** հիմնադրամն է:

Նյութի ամբողջական կամ դրանից քաղվածքների վերարտադրումը թույլատրվում է իրականացնել միայն **«ԼՈՒՅՍ հիմնադրամ»** գրառման և համապատասխան **ակտիվ հղման** տեղադրման պայմանով՝ պահպանելով «ԼՈՒՅՍ» հիմնադրամին պատկանող նյութերի օգտագործման կարգը: